

# **ALIANSA NASIONAL BA TRIBUNAL INTERNASIONAL**

## **Komunikadu ba Imprensa**

Kona-ba

**Kondekorasaun PR Jose Ramos Horta ba**

**Jenderal Indonesia Reformadu Hendropriyono**

**Iha okaziaun Komemorasaun Loron FALINTIL ba dala-47**

Iha okaziaun komemorasaun loron FALINTIL foin dadauk, Sabadu, 20 Agostu 2022, publiku hakfodak ho publikasaun Media Sosial kona-ba kondekorasaun medalla husi Presidente Republika Dr. Jose Ramos Horta (JRH) ba Jenderal Indonesia Reformadu AM Hendropriyono hamutuk ho Jenderal Komandante Forsa Armada/Defeza paiz viziñu Indonesia, Jeneral Moh. Andika Perkasa no husi Australia, Jeneral Angus Campbell nomos Chefe Armada Forsa Portugues, Admiral Antonio Ribeiro.

Ladun iha notisia ka informasaun ba publiku kona-ba razaun ka konsiderasaun husi ita nian Presidente Republika hodi kondekora ema hirak ne'e – liuliu ba Jeneral Reformadu Hendropriyono. Ami la kestiona kondekorasaun ba Jeneral nain-2 husi Komandante aktual Forsa Defeza paiz viziñu Indonesia no Australia, tanba ne'e nudar jestu ba politika boa-viziñansa hodi prevene konfliktu armada ka haburas relasaun dame entre viziñu. Maibe kondekorasaun ba Jeneral Reformadu Hendropriyono ne'ebe ita lahatene razaun saida, ne'e lamentavel tebes.

Lamentavel tanba, serake PR JRH la hatene sé mak Hendropriyono? Ka serake hatene, maibe tanba hakarak hetan privileju internasional ruma ba Fraternidade Umana, depois sakrifika ka ha'kanek sentimentu ema vitima violasaun direitu umanus, tantu iha Timor-Leste nomos Indonesia?

Iha realidade, ita nian politika Estado ignora justisa (julgamentu) ba autor violasaun direitu umanus sira durante konfliktu politiku 1974 – 1999, nune'e mos la hatudu firmeza ka konsistensia ba politika reparasaun ba vitima violasaun direitu umanus – no perfere tau-atensaun liu ba funu-nain sira (veteranu), enkuantu ema ne'ebe sakrifika atu salva funu-nain sira (populasaun baibain) no aktivista direitu umanus, tantu Timorensen nomos Indonesia, ne'ebe durante ne'e servisu ba defende justisa vitima sira, ita la konsidera tiha.

Nudar Presidente Estado, tantu Timor-Leste ka Indonesia nomos paiz seluk, tuir loloos ne'e iha responsabilidade atu lidera funsionamentu Estado ba produz Bens Publiku no

haburas valores umanidade no justisa social, laos pur-kontrariu halo politika ne'ebe haburas fali buat sira kontra interese publiku no Impunidade tanba deit ambisaun pessoal?

Tuir Konstituisaun RDTL, Presidente da Republica iha direitu preogrativu sira, maibe la signifika PR bele halo politika arbiru deit. PR nudar garantor ba kumprimentu konstituisaun, nune'e iha obrigasaun atu halo tuir prinsipiu no norma sira iha konstituisaun. Iha Artigu 1 preve katak RDTL ne'e nudar Estado do direito democratico, soberano, independente no unitariu bazeia ba vontade popular, laos vontade unipessoal. Nune'e, nudar Chefe Estado atu uza direitu preogrativu sira ba halao politika ruma ne'e, tenki haktuir vontade popular. Iha kontektu ne'e, vontade husi vitima violasaun direitu umanus sira mak lejtimu ba PR nian politika.

### **Sé mak Jeneral Reformadu AM Hendropriyono?**

Nia moris iha Jogja, iha 7 Maiu 1945, no licenciadu Akademia Militar Indonesia iha tinan 1967, no iha tinan 1972 – 1974 nudar Komandante *Kompi Prayudha Kopassandha (Komando Pasukan Sandi Yudha)* ne'ebe involve iha operasaun ba perparasaun invazaun ba Timor-Leste. Iha momentu ne'ebá, nia aktivu iha Operasaun Komodo (infiltrasaun intelijen Indonesia mai Timor-Portugues) no involve iha planu rekruta milisia no treinamentu ba milisia ne'ebe depois sai PARTISAN iha 1974-1975 iha Atambua, NTT, Indonesia, molok invazaun.

No iha tinan 1976, tuir Relatoriu CHEGA! depoisde invazaun Indonesia tama mai Timor-Leste, Hendropriyono involve hodi harii grupu milisia Timorenses ho naran TONSUS ne'ebe depois halo operasaun preseguisaun ba ita nian rezistencia FALINTIL.

No iha momentu Maun Boot Xanana Gusmao militar Indonesia kaptura no iha prosesu julgamentu, Jeneral Hendropriyono ne'ebe nudar Diretor D *Badan Intelijen Strategis (BAIS ABRI, 1991-1993)* intervein hodi obriga ita-nian Maun Boot atu simu advogadu husi militar Indonesia Sr. Suyono, ne'ebe sei sai nudar "boneka" iha prosesu justisa.

No iha tinan 1993 – 1994, nia nudar Diretor A BAIS ABRI, no iha tinan 1993 – 1994 nudar Panglima KODAM JAYA Jakarta, aktivu halo operasaun preseguisaun ba aktivista Timorenses sira ne'ebe luta pasifika ba ukun rasik a'an iha Jakarta. Estudante Timorenses barak mak sofre tortura no detensaun illegal husi ninia politika.

Iha tinan 1999, momentu prosesu referendum, Jeneral reformadu Hendropriyono ne'ebe nudar Ministro Transmigrasaun momentu ne'ebá – no tanba ninian antesedente nudar militar, maka hetan partisipasaun mos iha planu ba halo "*Operasasi Bumi Hangus*". Operasaun ne'ebe "sunu-mutuk" no duni populasaun Timorenses ba Timor-Ocidental ho intensaun atu justifika razaun Indonesia katak maioria populasaun Timorenses hakarak hili Otonomia Espesial ho Indonesia.

Ne'e faktus ne'ebe deskobre husi Relatoriu CHEGA – ne'ebe Sua Exelensia PR JRH konsidera nudar Ensiklopedia ba Timorensen. Serake ita amnesia (haluhan) hotu ho buat hirak ne'e?

Jeneral Reformadu AM Hendropriyono laos deit iha "*track record*" LIMAN RAN ba povu Timorensen, maibe mos ba povu Indonesia.

Tuir relatoriu no peskiza barak denunsia ona katak involvimentu Hendropriyono iha violasaun direitu umanus hirak iha Indonesia.

Iha tinan 1987 – 1991, nia nudar Komandante DANREM 043/Garuda Hitam Provinsi Lampung, Sumatra, Indonesia. Momentu ne'eba nia lidera operasaun hodi tiru-mate (masakre) ba populasaun sivil iha Suco Warsidi, Talangsari, Lampung. Okontesimentu ne'e depois koñesidu ho "Akontesimentu Talangsari 1989".

No iha tinan 2001 – 2004, nia nudar Chefe BIN (Badan Intelijen Indonesia) involve iha planu no ezekusaun ba aktu asasinatu aktivista Direitu Umanus Indonesia, M. Munir (mate ho venenu iha viajen aviaun ba Olanda). Munir nudar aktivista direitu umanus, ne'ebe laos deit defende direitu povu Indonesia, maibe mos povu Timorensen.

### **Serake aktu kondekorasaun Autor Violasaun Direitu Umanus nudar Jestu ba haburas valor "Fraternidade Umana?"**

Ideia Fraternidade Umana ne'ebe PR JHR opta nudar ideia jenuinu husi Amo Papa Katoliku Francisco hodi promove paz/dame iha mundu, bazeia ba ita relijiaun 3 (kristaun, muslimanus no judaia) ninlan hun mak Abrão. Durante ne'e funu iha mundu tanba razaun relijiaun. Nudar fiar-nain husi relijiaun sira, ita hotu aseita no hakarak Dame iha mundu no laiha tan funu tanba razaun ambisaun ka vingansa relijiaun.

### **Maibe ba kestaun iha kontektu ita-nian, laos funu tanba relijiaun.**

Iha Indonesia maioria Muslimanus, no ita maioria Katoliku. Problema laos relijiaun, maibe problema mak violasaun direitu umanus (krimi kontra umanidade), tantu iha Indonesia nomos Timor-Leste, no responsabilidade Estado rua ne'e ba aktu violasaun ne'e, hodi hakotu siklu IMPUNIDADE no garantia ba PAZ ROHAN-LAEK.

Kondekorasaun PR JRH ba Autor Violasaun, tantu ba Jeneral Reformadu Hendropriyono nomos Eurico Guterres (Ex-komandante Milisia Pro-Jakarta) husi Presidente Republika Indonesia, Sr. Jokowi iha tinan 2 liu-ba, nudar aktu KONTRA obrigasaun Estado ba kombate hahalok kontra interese publiku no haburas fali impunidade.

Impunidade ninia efeitu mak sei haburas violasaun no violensia ka krimi iha sosiedade aktual, hanesan abuzu poder, korupsaun, konflitu artemarsias violentu jovens sira, no trafiku droga sira,

Kondekorasaun husi PR Indonesia, Jokowi ba ex-komandante milisia Eurico Guterres no kondekorasaun PR Timor-Leste, JRH ba jeneral reformadu Hendropriyono, laos deit ha'kanek sentimentu vitima violasaun direitu umanus iha Indonesia no Timor-Leste, nomos promote IMPUNIDADE iha Estado rua ne'ebe nudar INIMIGU ba Estado.

Estado rua ne'e ignora atu halao Justisa Punitivu ba autor violasaun direitu umanus iha passadu, no perfere halao deit Justisa Restorativu, maibe la haktuir prinsipiu ho loloos. Katak justisa Restorativu ne'e tenki sentraliza ba iha vitima hodi halao reparasaun ba sira nian kondisaun, no laos reabilita ka valoriza fali autor sira. Politika hanesan, mak haburas fali impunidade.

Serake paradigma Estado agora muda ona hodi servi no hahi fali Bandidu sira?

Serake PR JRH ho konsiensia rasik hakarak duni promote IMPUNIDADE? Serake ne'e laos violasaun ba Promesa nudar Presidente Republika (kumpri no halo kumpri konstituisaun) ne'ebe deklarasaun iha 20 Maiu 2022 iha Tasi Tolu?

Dili, 23 Agostu 2022

Asinante:

1. Asosiasaun HAK, Sisto dos Santos
2. Asosiasaun Vitima Konfliktu Politiku 74-99, Domingos Pinto de Araujo Moniz
3. Asosiasaun CHEGA ba Ita, Manuela Leong Pereira
4. Lao Hamutuk, Celestino Gusmao Pereira
5. Asosiasaun Halibur Defisiensi Matan TL, Gabriel P de Sousa
6. AJAR, Jose Luis de Oliveira
7. Aktivista Feto ba Justisa Pasadu, Marta da Silva
8. ....